

Sel Prestuhn Dieter F. Uchtdorf

Mwet in Kahsruh Ahkluo ke
Prestuhnsi Se Met



Kosracni luhn God

Sie muhtwacn pahngpahng Christa el tuh orekma ke sie kampihni in kuhka fihtac srihsrihk. El luhngse orekma se lal ah. Pa oruh sie oruh wolacna yohk ma kais sie fihtac srihsrihk el kuhkwackuhnlah kuh in eklac nuh ke sie ma usrnguck wolacna—sie carrot, sie cabbage, kuh finne soko sahk oak luhlahp.

Christa el luhngse muhta eis ohtoh ac topuk kihsen siyuck ke kampiutucr nahtuhl ah. Tuhsruhk sie lwen ah el eis sie tohrkahskahs ma ahkfohsyaclack.

“Fihtac inge tiacna wo,” mwet moli sac fahk. “Nga molwelah ke mahlwem luo tari ah ac soenna sruhnwack.”

“Kuh kom yukiyac ke fohk wowo ac twekofi wo ac fihliyac ke acn faht?” Christa el siyuck.

“Moh, tuhsruhk nga oruh ip luhk kac,” mwet moli sac tohpohklah. “Nga molwelah fihtac ah. Sahflahiyac ah, fihtac ah *uliyucklac* in kapwack.”

“Tuhsruhk kom tiacna yukiyac?”

“Kuh sel tiac oacna. Kalmac pa ngwac fohkfohkwelah pouk.”

Christa el nuhnkuh ke oruh se inge ac sulaclah lah ohiyacn yok uh ac enenuh in sihmlac. El konwacack oruh se emet kac uh: “Kom enenuh in ukwe ahkuhtweyucki luhn yok fihtac an in kuh in sruhnwack. Kom tiac kuh in loangweack fihtac an oan ac nuhnkuh in kapwack.”

Tiac paht tohkoh ke sie pac tohrkahskahs ahkfohsyaclack.

“Fihtac uh soenna oasr fahko,” sie mwet moli fahk kac.

“Kuh kom yukiyac ke fohk wowo?” Christa el tohpohklah. “Kuh kom twekofi fal ac fihliyac ye faht?”

“Wee, ahok,” mwet moli sac fahk kuh kac. “Nga oruh kwewa ma ngwacn—oacna ke fwack ke nuk kac an. Tuh-sruhk tiacna orekma.”

“Kuh oasr kuhtwena ma sikyak kac? Kuh fihtac an sruhnwack?”

“Wacngihn ma sikyak,” mwet moli sac fahk. “Nga yukiyac oacna ke fwackyuck ah. Nga finsrakkihn in mongo tomacro oyekuh. Ingena nga toasrlah na pwacye.”

“Kollac wihn,” Christa el tohpohklah. “Kuh kom fahk lah kom yukiyac fihtac an mihsenge?”

“Nimet kom wel,” mwet moli sac tohpohklah. “Nga yukiyac ke wik tari ac. Nga tiac motko in liye tomacro ke lwen se emet ah; Nga mongfihsracsr. Lwelah ngan fahkoht, yohk twekofi ac tuhpan ke pacl sac nwe ingena.”

Christa el etuh lah el enenuh in sang pac sie ohiyacn yok sahyac: “Fihtac inge ahkos masap ke moul luhn sahkuh ma orahkrahk uh. Kom fin yukiyac fihtac uh ke lutacng ac motko in mongo tomacro ke kapihn wik sacn, kom ac fah inse koluklac. Kom enenuh in mongfihsracsr ac tuhpan ke oruh luhn kasrpacn acn uh in orwacclah nuh ye motom.”

Ma nuh kwewa fal wo nwe ke Christa el eis sie pac tohrkahskahs sahyac.

“Nga inse koluklac na pwacye ke fihtac lom ngacn,” mwet moli sac muhtwacwacack fahk. “Nga yukiyac

oacna ke nuk sac fahk ah. Nga twekofi, oruh in oasr faht srweyac, ac tuhpan nwe ke sahflahiyac ah foklac nuh ke kosracni la.”

“Kahlwem lah kom oruh ma nuh kwewa wo,” Christa el fahk.

“Ma nuh kwewa arulacna wo,” mwet moli sac tohpohk-lah. “Tuhsruhk ma nga eis kac ah pa zucchini!”

“Pwepuh nuhtihk uh ahkkahlwemye fahk lah pa ngacn fihtac ma kom ohtohiyac,” Christa el fahk.

“Tuh nga sruhnga zucchini; nga luhngse pumpkins!”

“Nga tiacna kahlwem kac.”

“Nga yukiyac fihtac ah ke acn luhn pumpkin luhk ah—ke fohk se pacna ma pumpkin ah yok kac ke yac tari ah. Nga kaksyakihn sahk ngwe lwen nuh kwewa, fahk nuh seltahl lah fuhkah kahtoiyacn pumpkin eltahl ac muh orwaclah uh. Tuhsruhktuh sahyacn pumpkin yohk, raun, rangrang, nga eis zucchini loeloes, ac folfol sra. Puhkan-twen na pwacye!”

Christa etwacack ke pacl sac lah ohiyacn yok ah kuh in tiac fal ac lah enenweyuck in fahk ip yohk se: “Fihtac ma kom yukwi uh ac pacl luhn yok an fahk ke ma in kosracni.”

Masap luhn Kosracni

Mwet Sap Paul el luti ke kosracni luhn God:

“Kowos in tia sifacna kiapwekowsla, tu God El tia ku in kiapweyukla. Kutena ma sie mwet el taknelik, el fah oayapa kosrani.

“El fin taknelik ke ma lungse lun ikwa, el fah kosrani ke ma ac fah kulawi. El fin taknelik ke ma lun Ngun, el fah kosrani ke moul ma pahtpat.

“Ke ma inge, lela kut in tia totola in oru ma wo: ke pacl fal kut fah eis kosrani lasr, kut fin tia fuhleak” (Galatians 6:7–9).

Ke pacl inge, Leum El acse nuh sesr suhmaht sahyac ac etuh nuh ke masap tiac kuh in ayaollac se inge:

God El ahkkahlwemye lah oasr masap se ma tiac kuh in pihlesreyuck ma suleyucklac fal met liki pwelucng luhn facluh se inge suc ma mwe in sewowo nuh kwewa oreklac nuh kac—

Ke kuht eis kuhtwena mwe in sewowo sin God, ma ke ahkosyancn masap ma oreklac nuh kac (liye D&C 130:20–21).

Ma kuht yukwi, kuht kosracni.

Kosracni luhn God pa wolacna tiac kuh in motkweyuck se. Nuh selos suc suhnak nuh Sel, mwe in sewowo yohk Lal tuhkuh ke “sie lupa na suwohs, ma toanyuki, usru-kyuki ac sifil tohtokak nwe ke kahkla. . . . Srihkasrak se ma kowos orekmakin nu sin mwet saya pa srikasrak se God El ac fah orekmakin nu suwos” (Luke 6:38).

Oacna ke fihtac fin facluh enenweyuck kuh ac mong-fihsracsr, oacpacna nuh ke puhsiyacn mwe in sewowo inkuhsrao uh. Kuht tiac kuh in loangweack alu lasr uh an ac motko in kosracni mwe in sewowo ke ip luhn nguhn. Tuhsruhk kuht fin yok ac tuhfa akwuck fal luhn wosasuc ke moul luhn sucu lasr pengana lwen, oasr finsrak yohk se ma tuhlihk nahtuhr uh fah kapwack in orwaclah fahko ke ip luhn nguhn ke ohiyac wo nuh selos ac nuh ke we fahsruh uh.

Top luhn God nuh ke pruhe lasr uh tiac sa tuhkuh pacl nuh kwewa—kuhtuh pacl uh ac luhman tiac sikyak na pwacye—tuhsruhk God El etuh ma wo emet nuh sin tuhlihk Nahtuhl uh. Ma na pwacye lah, sie lwen kuht ac fah liye wo liki; ac ke lwen sacn kuht fah akihlen ma wo ac etatwen luhn inkuhsrao.

Nuh ingena, finsrak ac engan yohk lasr uh pa in fahsr ke falkacn niyacn Mwet Luti ac Mwet Lahngo lasr ac in moul wo ac ahkwoye moul uh in muh olwelah ac kosracni sacohk ke mwe in sewowo yohklac molo luhn God kuh in ma lasr.

Ma kuht yukiyac, kuht kosracni.

Pa ingacn masap luhn inkuhsrao uh.

Pa ingacn masap ke kosracni luhn God uh.

LUTI KE PWENG SE INGE

Sramsramkihn nuh sin mwet kom muhtwacta yohroh an ohiyacn masap ke kosracni luhn God orekmakih-nyuck ke kuhpahsr uh, eklac ac fahkwack luhlahlfongi, kuh finsrak ke orekma ac lutlut uh. Kom kuh in riti ac nuhnkuh ma suhmuhslah kuhpahsr nuh ke masap se inge, ma oacna Soakas 11:18; 2 Corinth 9:6; ac Alma 32. Ahkkweyacos in sifil liye finsrak met ah ac orwaclah finsrak sasuc in eis ma sikyak suwohswohs kac. Kahsrwe-los ahkyohkye sie plwacn in oruh na kac in sun srihpac nuh ke pacl loeloes lalos an.

Plwacni Kosracni Lom An

Masap luhn God ke kosracni pa lah kuht fin luhngse sie ma tok, kuht enenuh in orekma nuh kac ingena. Kuht fin ke oruh sie imac srihsrihk, kuht enenuh in yok fihtac, tweekofi, ac karihngihn in tiac oasr mah kac. Kuht fin tiac oruh ma inge, ac wacngihn kosracni lasr tok!

Tahk se ten inge pa kuhtuh "fukun sahk" wowo kom kuh in luhngse nuh ke moul lom an. Suhmuhsleh kuhtuh ma kom kuh in oruh ke mahlwem se inge in kahsrwe kom eis mwe in sewowo inge.

- Sie lohm engan
- Lutlut
- Kawuck wowo
- Pacptais ac Ahkkweyeyuck
- Fahkwack Luhlahlfongi ke Jisus Kraist

© 2014 sel Intellectual Reserve, Inc. Kuh ac suwohs nuh kwewa fihliyucki. Sihmlac fin acn USA. Ahkkweyeyucklac ke kahs English: 6/14. Ahkkweyeyucklac ke lweng: 6/14. Lwenglah luhn *First Presidency Message, August 2014*. Kosraean. 10868 868



Misin Muhtahl luhn Jisus Kraist: Messiah

Pruhe in lutlutkihn kuhfa inge ac suk in etuh ma in akacsruhi kac. Etuh moull ac misin luhn Mwet Lahngo ac ahkyohkye fuhkah kuh in luhlalhfongi lom Kacl ac ahkinsewowoye mwet kom liyacacng ke forfor luti uh? Nuh ke kuhtuh pac ma in etuh, som nuh ke relief society.lds.org.

Luhlalhfongi, Sucu, Kahsruh

Pa inge ip se ke Pweng ke Forfor Luti ma liyeyuck ke ma nuh kwewa ke misin luhn Mwet Lahngo.

Ma suhmuhslah uh luti lah kuht kuh in ilyak nuh ye muhtuhn God ke ma wo, ac luhng kuhlwcacng, ac tarilac luhn Messiah Muhtahl (2 Nephi 2:8). *Messiah* “kahs Aramaic ac Hibru se ma kalmac pa ‘akmuhsralah.’ . . . Ke Wuhlwcacng Sasuc Jisus El pahng-pahng Kraist, suc ma kalmac nuh Greek pa *Messiah*. Kalmac pa Mwet Pahluh, Mwet Tol, Tohkohsrah, ac Mwet Molwelah akmuhsralah.”¹

Elder Jeffrey R. Holland ke U luhn Mwet Sap Singucul Luo el fahkwack: “Nga etuh [Jisus Kraist] pa Mwet Muhtahl se luhn Israel, Messiah se suc ma sie lwen fah sifil tuhkuh ke wolacna sahflah, in kol facluh oacna Leum luhn leum ac Tohkohsrah luhn tohkohsrah uh. Nga etuh lah wacngihn ine sahyac utuckuh ye kuhsrao ma mukul [kuh muhtwacn] kuh in moullac kac.”²

“[Jisus Kraist] pa Mwet Lahngo ac Mwet in Molwelah luhn facluh,”

President Dieter F. Uchtdorf, Mwet in Kahsruh Ahkluo ke Prestuhnsi Se Met el fahk. “El pa Messiah uliyuckme sac. El moullkihn moull wowo ac iwe ke ma koluk lasr uh. El ac fah wi kuht pacl nuh kwewa. El ac fah acnwuck ke mweun lasr. El pa finsrak lasr uh; El pa molwelah lasr uh; El pa inkacnek uh.”³

Ma Suhmuhsalah Ituckyang Sahyac

John 1:38–41; 4:25–26, 40–42; 2 Nephi 6:13; 25:16–17

Ke Ma Suhmuhsalah uh

Mwet tuhma lutlut muhtwacn luhn Kraist lohohkihn tari kunohkohn Lal in oacna Messiah. Mary Magdalene pa tuh sie mwet tuhma lutlut luhn Jisus Kraist. El pa emet in liye “eot se itucklac liki kuclyuck sac” ke lotutacng se ke Sifil Moulyak luhn Kraist. El “tu na tung likin kulyuk ah” tukun el liye lah Mahnol wacngihnlac lun kuclyuck sac.

Na “el tapulla ac liyalak Jisus El tu insac, tusruktu el tiana akilen lah Jisus.

“Jisus El fahk nu sel, Mutan, efuh kom ku tung? Su kom suk an? Mary el nunku mu el mwet ima se, ouinge el fahk nu sel, “Fin kom pa usalla, fahk nu sik acn kom fililya we, ac nga fah som eisal.”

“Jisus El fahk nu sel, “Mary!” Mary el forang nu sel ac fahk ke kahs Hebrew, ‘Rabboni!’ kalmac pa Mwet Luti.” Mary el akihlwacnwack lah El tiac pa mwet imac se tuhsruhk Jisus Kraist, Messiah sac. (Liye John 20:1–17.)

MWE KAHSRUH

1. Mwe Kolyuck nuh ke Ma Suhmuhsalah, “Messiah”; scriptures.lds.org.
2. Jeffrey R. Holland, “The Only True God and Jesus Christ Whom He Hath Sent,” *Liahona*, Nohfuhmpuh 2007, 42.
3. Dieter F. Uchtdorf, “The Way of the Disciple,” *Liahona*, Mei 2009, 78.

Nuhnkuh Ma Se Inge

Efuh kuh yohk srihpac in etuh ke kunohkohn luhn Mwet Lahngo in oacna Messiah?